

## DONNA MARA E MASTRU TITTA

(*Dialugu*)

Donna Mara, sintiti pri favuri,  
'ntra 'stu curtigghiu nun si pò cchiù stari,  
la testa nun reggi, 'ntra tutti l'uri  
si senti vostra figghia vuciari,  
cuminchia cu la solita cantata  
e nun s'adduna di quant'è stunata.

Si studia pri fari la cantanti,  
iu vi cunsigghiu ca cci leva manu;  
Sintitila !! di com'è scuncirtanti,  
stunata veramenti e pari stranu,  
fa certi noti, sull'onuri miu,  
ca cu la senti dici: chi schifiu !!

Mastru Titta, pirchè tantu parrati ?  
siti 'gnuranti, nun capiti nenti,  
'ddi noti chi vi parinu stunati,  
si chiamanu gurgheggi, vulgarmenti  
cci lu dissi lu prufissuri, Pala  
e quantu prima cantirà a la Scala.

La sentu, cānta puru 'ntra la Scala  
ogni vota ca scinni pri scupari,  
però, sintiti a mia, donna Mara,  
vostra figghia fà veru vumitari.  
Tintu scarparu e misiru viddanu,  
vi parlu di la Scala di Milanu.

Sintitila. . . chi vuci aggraziata,  
vi spiccica lu cori, s'ascutati;  
la sentu di quant'è disgraziata,  
si merita 'na pocu di lignati.  
Si stà 'mparannu già la Traviata,  
quannu si fà cunsunta, all'urtimata.

Cussì sul putemu arrifriscari  
chiddi chi stannu dintra 'stu curtigghiu  
vui lu sangu l'aviti agghittari,  
ca nun sapiti di cu siti figghiu;  
vuliti 'u mè consigghiu: donna Mara,  
vostra figghia pò fari a lavannara.

### SENZA CORI

Saria curiusu di sapìri  
si tò matri ti fici senza cori,  
o si l'hai, è di pietra, si mi criri,  
tu muriri mi fai di scattacori.  
Chi vannu 'sti biddizzi chi tu teni,  
si notti e ghiornu tu mi duni peni ? !

Lu sai, ti vogghiu beni a la pazzia,  
a puntu ca nun reggi la me menti,  
e mentri penzu di fariti mia,  
tu ti dimostri sempri 'ndifferenti !  
Ju fici un vutu a Santa Rusulia,  
si tu diventi mugghiruzza mia !

Me matri sapi tutti li mè peni  
e mi cunforta cu li sò paroli,  
mi dici: d'aspittari mi cunveni,  
cu sà jdda dicide ca ti voli.  
Si siti pi davveru destinati,  
virrà lu jornu quannu vi spusati.

Matruzza cì rispunnu: ma chi diti ?  
Chista filicità nun è pi mia,  
sidd'eru furtunatu mi criditi  
mè patri a la miniera nun muria !!  
Penza ca matrimoni e viscuvati,  
sù sempri di lu celu destinati.

Matri mia picchè nun cì parati ?  
Diciteci ch'è tutta la mè vita,  
forsi virennu a Vui ca la prigati,  
Vi runa 'na risposta chiù cumprita.  
Ma si Vi dici NO': Matruzza mia,  
preparati un tabbutu puru a mia !!

## UN SCARPARU A CANDITATU

'Na vota 'ntra 'na lista elettorali,  
mancava un nomu p'essiri cunmpleta,  
pì canditatu cci vulia un tali  
un'artigianu cu cirvellu di crita,  
dicensiru pii darici riparu,  
mettiri in lista un poviru scarparu.

Un certu Don Nicola fu 'nvitatu,  
ma di politica nenti sapia,  
e lu mischinu s'era rifiutatu:  
dicennucci: faciti fissaria,  
ma chisti insisteru in maniera tali  
ca a lu scarparu cci parsi veru mali.

Pò l'invitaru pii fari un cumiziu,  
lu poviru nun sapia 'nzoccu diri  
e privinennu qualchi pricipiziu  
cci lu dissi ca brutta pò finiri,  
chisti insisteru cu tanta mastria,  
ca sù purtaru a la piscaria.

Ddà c'era un beddu palcu priparatu,  
e lu scarparu prontu p'acchianari,  
ma unu chi l'avìa già sbintatu,  
cci fici un piritu di fari trimari,  
lu scarparu veru spiritusu,  
cci dissi: comu scinnu t'attuppu 'stu pirtusu.  
Poi dissi: in modu patriarcali,  
o vaiu a Roma, o puru a lu spitali.

Signuri mei, finiu malamenti,  
pì comu lu scarparu prividia,  
li pìrita foru tanti veramenti,  
ca lu scarparu la calma pirdia,  
scinnù du palcu, e all'incaricati,  
ccì dissi curnuti e disgraziati.

Stu fattu cci lu dissi a sò mughieri,  
ca a n'atru pocu era Diputatu;  
idda cci, dissi: pezzu di fumeri,  
comu fù cun tannu lapidatu,  
lapidatu nò, iddu cci rispusi  
ma li pìrita foru furiusi.

## A CHIDDA CHI M'INTENNI

Chiantài un ciuri 'nta lu misi d'Aprili,  
'nta Maggio mi sbucciò russy sbampanti,  
'stu ciùri siti vui donna gintili,  
'stu ciùri siti vui donna galanti.

La bedda littra ch'ju vi mannài  
fu pi suddisfari un miu disù,  
li mè pruggètti, tutti spalisài,  
e la firmavi cu lu sangu miu.

Iu dintra cì alligài 'na bedda rosa  
ca di sicùru vi fici piacìri,  
certu chi nun è stata 'na gran cosa  
però cu li mè manu la cughivi !!

Lu restu spetta a vui, si c'è da fari,  
aspettu la risposta pi scialari,  
fici la pianta pi vi rigulari,  
ed ora spetta a vui lu fabbricari.

*(In confidenza ai lettori)*

Si mè mughieri di tantu s'addùna,  
sicùru ca m'addubba a timpulùna.

## BIDDIZZA RARA

Quànnu passu di cà passu cantànnu,  
dimmillu si tu senti la mè vuci,  
nun viri ca pi tia st'aju spasimannu,  
notti e ghiornu mi sentu misu 'n cruci !

Nni canuscio assai fimmini beddi,  
però la tò biddizza è spiciàli,  
puru chi giru curtigghi e vanèddi,  
bidduna comu tia nun c'è l'eguali.

Li Fati, nun ti ponnu supirari  
picchi la tò biddizza è veru rara,  
tu sì 'na Madunnuzza d'ammirari  
'nmenzu a tanti ciuri supra 'na vara.

Iu mi n'addugnu ca sì curtiggiata,  
macari li chiù megghiu vonnu a tia,  
tuttu lo jornu c'è 'na passiàta  
di studenti, mastranza e signurìa.

Iu scumméttu ca mancu un gran pitturi  
sapissi 'sta tò facci pitturari  
truvàri nun putissi li culùri  
pi 'sta facciùzza farla risaltàri.

Pi tia st'aju pirdénnu pace e sonnu,  
penzu sempri comu ti pozzu amari,  
ma siddu li mé vezzi nun ci ponnu,  
pi mia è tuttu inutili campàri ! !

## FIMMINA VILI

Senza nudda ragioni mi lassasti,  
dopu dui anni ch'éramu ziti,  
dimmillu si la testa ti sbintàsti,  
vulennu fari ora chista liti.

Iò, t'haiu vulutu beni veru assai,  
e ora tu mi metti 'ntra li guài !

Si prima ancora nun t'haiu spusata  
lu sai ca la culpa nun è mia ,  
è stata tò matruzza veru 'ngrata  
a diri sempri: è nica Nuccia mia !  
Ora, forse, trovò 'n'atru partitu  
e ti lu voli dari pì maritu.

E tu canciasti puru di pinzéri,  
pi sbarazzàriti prestu di mia,  
mi lu dicisti già l'avutru aeri,  
ca fussi megghiu di canciari via,  
nun ti criria nò, tanta leggéra  
comu lu ventu, canciàsti bannéra.

Ricordati però ca mi vò mali,  
dopu ca di tia mi 'nnamurai,  
si tutta 'ntra u mé cori e comu tali,  
mortu di pena tu mi truvirài,  
ma si moru pi tia, fimmina vili,  
di tia nun vogghiu ciuri né cannili !!



## LI CURNUTI VOLONTARI

L'omu, chi mancia supra la muggheri,  
è sempre un gran curnutu patintatu,  
campa filici e senza pinzeri,  
nun si curannu s'è disonoratu,  
nun sapi quannu agghiorna e quannu scura,  
sulu canusci unn'è la manciatura.

Nni 'ncontru spissu di 'sti CAVALIERI,  
ca fannu li signuri pi li strati,  
cu li dinari vannu né chianchieri  
pi s'accattari carni in quantitati,  
vonnu lacerti e boni filetti,  
e fumanu li megghiu sigaretti.

Di chisti ci n'è tanti conosciuti,  
e di li genti sù signaliati,  
li chiamanu magnacci e gran curnuti,  
e marcianu macari profumati,  
però, criditimi in parola mia,  
hannu li corna longhi a ferrovia.

Li sò muggheri nescinu 'mpupati,  
si fannu fari li megghiu tuletta,  
cu li dinari di li 'nnamurati,  
e li mariti nun cci stannu attenti,  
ma 'st'omini sù chiddi tali e quali,  
chiamati gran curnuti NAZIONALI !!

## MI VOGGHIU CUNFISSARI

Chiamatimi lu Patri confissuri,  
mi vogghiu a lu chiù prestu cunfissari,  
fici un piccatu, piccatu d'amuri;  
cu 'stu rimorsu nun vogghiu campari.

'Na picciotta mi fici 'nnamurari,  
quannu lu spissu stava a lu mé latu,  
lu restu nun lu pozzu spalisari,  
sinnò v'avissi a diri lu piccatu.

Era bidduna, cu li trizzi scuri,  
la paci m'arrubò cu d'occhi latri,  
pi jdda mi scurdai lu Signuri  
e chidda vicchiaredda di mé Matri !

Videmu chi mi dici lu Parrinu,  
qual'è la pena chi aju a scuntari,  
ma si mi dici: lu tuttu è distinu,  
ci rispunnu: m'a vogghiu maritalari.